



08689

郭侍郎奏疏卷三

紳民同仇敵愾力保危城援案仰懇永

增學額疏

會稽縣
督學

政

奏爲紳民同仇敵愾力保危城援案仰懇

天恩永增學額以廣

皇仁而昭激勸恭摺仰祈

聖鑒事竊照廣東省四會縣城於咸豐四年間被逆匪陳金缸闖入經該縣紳練隨同文武員弁協力攻勦旋即克復九年間懷集逆匪由廣甯竄入圍攻縣城該縣紳民登陴守拒奮勇擊退十年二月間積匪侯陳帶等

奏疏卷三

糾邀練四苦等十餘股由賀縣突至四會恃眾攻城勢甚猖獗其時兵力單薄援師未至危險萬分該縣紳民眾志成城晝夜固守逆匪三次挖掘地雷城垣轟缺冒死衝入均能極力擊退登時補葺完固轉危爲安直至三月有餘大軍畢至始將該匪合擊敗逃縣城賴以保全歷次堵剿固守情形均經前督撫臣先後奏報有案嗣據該縣士民援照咸豐七年福建建安甌甯二縣保守危城奉准永遠加廣學額成案呈請永廣四會縣文武學額各二名由縣確核通詳前撫臣當查咸豐十一年辛酉科部頒科場條例內所有福建省團練守城出

力請加學額欽奉

諭旨允准是勘匪保城增廣學額已有成案但條例內

未將原奏刊入或恐情節不符卽經移准福建撫臣鈔

錄原案咨復內開咸豐七年江西逆匪闖入閩疆圍攻

建郡建安甌甯二縣紳民協力固守克保危城經閩省

督撫臣奏請加廣學額於咸豐九年五月初八日欽奉

上諭江西逆匪闖入福建圍攻建甯府城建安甌甯二

縣士民同仇敵愾協力固守二月有餘克保危城四鄉

團練并與團丁聯絡捐資出力隨同大兵平燬賊營百

數殲擒逆匪萬餘實屬深明大義所有建安甌甯二縣

奏疏卷三

二

均著永遠增廣文武學額各三名以昭激勸欽此今廣

東四會縣紳民辦團剿匪克復縣城之後連年被賊圍

困均能嬰城固守而咸豐十年困守三月之久以待援

師尤屬果毅堅貞深明大義核與福建建安等縣剿匪

保城之案情節相同據軍需總局司道吳昌壽等議詳

請

奏前來合無仰懇

天恩俯准援照閩省成案將四會縣永遠增廣文武學

額各二名以昭激勸之處出自

逾格鴻施除分咨戶禮二部查照外臣等謹會同廣東

學政臣 王澐恭摺具

奏伏乞

皇太后

皇上聖鑒訓示謹

奏

奏疏卷三

三

甲子科鄉試駐防繙譯鄉試應請依限舉行疏

會統督銜

奏爲廣東省甲子科文武鄉試並駐防繙譯鄉試應請依限舉行恭摺覆

奏仰祈

聖鑒事竊

臣

等接准禮部咨奏奉

諭旨飭查同治二年甲子科鄉試軍務省分能否依限舉行考官赴省有無繞道按照具題考官例限先期一月奏到其有駐防省分繙譯鄉試能否照例舉行亦於摺內聲明等因當經分別咨行查照去後茲據廣東布政使吳昌壽等詳稱廣東省軍務僅止肇慶土客一案

奏疏卷三

四

及零星小匪尙無礙於大局本年甲子科文武鄉試自應依限舉行以隆作育而重賓興惟廣東至京驛路正站向由江西湖北江南山東直隸各省行走前屆辛酉壬戌兩科鄉試因安徽江西等省驛路梗阻經前撫

臣

耆齡等

奏明正副考官改由河南湖北湖南等省繞道來粵嗣於同治元年十一月及同治二年二月先後接准江西安徽撫

臣

咨會江西安徽各州縣次第肅清所有粵東遞京文報卽經照舊由江西南贛正站行走各在案本年正副考官來粵可否照依遞文驛路由江西安徽各

省行走抑應繞道河南湖北湖南等省之處應分咨各
省體察情形隨時知會考官查照其駐防繙譯鄉試已
准廣州將軍臣瑞麟等咨會將考試過廣州駐防繙譯
錄科人數試卷咨送禮部查核屆期題

派考官夾片請題等由臣等覆查無異除咨戶禮兵三
部查照並咨各省督撫查明驛路能否通行隨時知照
考官外所有廣東省同治三年甲子科文武鄉試並駐
防繙譯鄉試應請依限舉行緣由臣等謹合詞恭摺覆
奏伏乞

皇太后

皇上聖鑒謹

奏

奏疏卷三

五

確查史杰參款及陶昌培章昇耀財產片

會總督銜

再臣等承准議政王軍機大臣密寄同治二年七月十

三日欽奉

上諭晏端書奏查明史杰被參各款並查鈔陶昌培章昇耀財產各一摺自劉長佑調任直督所有查辦史杰參款查鈔史杰陶昌培章昇耀財產均由晏端書辦理其所封鈔財物與原參數目大相懸殊尤恐中多不實不盡不免爲人蒙蔽著毛鴻賓郭嵩燾於到粵後將史杰被參各款再行按照原參逐一切實詳查務得確情嚴行究辦其史杰陶昌培及章昇耀財產難免別有隱

奏疏卷三

六

頓並著該督撫再行訪查嚴密辦理具奏聞該省在籍候選道馬逢亨卽有爲陶昌培等寄頓情事未知是否確實並卽詳細訪查毋任藏匿毛鴻賓郭嵩燾均受國厚恩優加委任諒不肯稍涉瞻徇代人受過亦無所用其迴護晏端書原摺二件均著鈔給閱看等因欽此臣等抵任後當卽公同嚴密訪查切實根究一面密囑藩臬兩司督同地方府縣廣諮博採確加查辦茲細覈案卷證諸公論所有史杰原參謀缺包私得規把持各款實在杳無確據亦無被人控案祇因平日辦事任才使氣不避嫌怨並曾代埠商招募水客致滋物議其財產

先已消耗迨經查鈔之後更致一貧如洗不能自存臣等覆加查察與晏端書查覆情形尙屬相符委無隱飾史杰及其弟史績懋俱已奉旨革職勒令回籍現復確查別無劣蹟應請毋庸再議至陶昌培由廣西至廣東爲時未久所得貲財浪費之餘本屬無幾經勞崇光拏問後又無親屬爲之照料浪散在所不免委無寄頓情形章昇耀財產借款亦經全行查封變繳銀四萬餘兩業據委員協同地方官逐細追求出具並無隱漏切實印結在案茲奉

聖訓在籍候選道馬逢亨有爲陶昌培等寄頓情事亟

奏疏卷三

七

應飭提馬逢亨到案嚴切訊究方成信讞詎馬逢亨患病沈綿屢提未到旋據報於本年正月初二日病故訪查陶昌培章昇耀等皆以奢侈揮霍耗散過多一經覈實封鈔財物遂致與原參傳聞數目相去懸殊馬逢亨本以沙田致富曾經罰捐銀十二萬兩此次擬令其報捐京餉因未到案亦尙未有成議詳考其平日往來蹤蹟實與陶昌培等素不相識今陶昌培章昇耀均已正法馬逢亨又已病故其有無寄頓財產杳無的確證據實屬無從追問據藩司吳昌壽臬司李瀚章及署廣州府知府李福泰等密查稟覆眾論僉同此案迭奉

諭旨嚴切查辦臣等受

恩深重如查有不實不盡亟當公同舉發澈底究辦斷不敢稍涉瞻徇誠如

聖明指示實亦無所用其迴護惟再四確加訪察委無別項情弊亦不敢不據實直陳所有遵

旨查明緣由謹合詞附片覆

奏伏乞

聖鑒訓示謹

奏

奏疏卷三

八

官軍攻剿三山賊匪老巢生擒首逆現在搜捕餘匪以
期淨絕根株

會總督銜

奏爲官軍攻剿三山賊匪老巢生擒首逆現在搜捕餘
匪以期淨絕根株恭摺由驛馳陳仰祈

聖鑒事竊廣東英德縣屬巨匪鄧二尺七等前乘石逆
餘黨竄擾粵境糾眾竊發經臣等檄飭統帶楚勇福建
臬司張運蘭移軍剿辦上年十二月初間攻破該匪三
山外巢大獲勝仗於十二月二十四日由驛

奏報在案該匪鄧二尺七因被擊敗踞守英德縣屬之
鶴背山中依山築壘樹立木城深挖濠溝密排槍礮山
前左右兩村皆傍山麓相爲犄角後路復有村莊數處

奏疏卷三

九

互爲聲援形勢極爲險固張運蘭調齊五隊楚勇亦依
山聯絡爲營竝令署英德縣馮寶封署陽山縣王錫誥
各帶隊勇分守東路之水浸洞西路之金雞坪以防奔
竄十二月十三日黎明率領全隊分三路進兵總兵文
恆久副將賀國楨由右路前進總兵易榮華葉明瑞等
由左路前進該司自領中軍督同遊擊譚發律等繞出
鶴背山後同時夾攻該匪率眾分途拒敵均被我軍擊
敗生擒頭目孔二十等陣斬及滾崖落澗死者共約千
餘人當將樓井大逕涌等處賊巢村落平燬我軍亦有

傷亡嗣是連日雨水不能進兵二十一日晴霽張運蘭復率各隊徑進先將附近山麓之左右兩村攻破向逆巢連撲數次俱爲槍礮所阻環攻三時之久賊巢內滾石礮火紛紛雨下遊擊易永茂越濠拔柵斬守柵之賊數人被礮子飛擊殞命把總劉明輝勇目鍾承天亦中槍陣亡總兵文恆久被礮傷肩背該匪抵死拒守張運蘭親督大隊斬馘悍賊百餘人鏖戰至夜方始收隊回營張運蘭察看該山前面險峻難以仰攻惟山後徑路坡陀稍易進攻隨於二十三四兩日派令各隊更番迭戰先將山後賊村數處攻破卽於山間開挖地道搬運

奏疏卷三

十

大礮偏近鄧逆老巢二十五夜勵兵秣馬預備火器於五更後帶領各隊直撲該逆堅巢越濠而進匪黨猝不及防被我軍噴筒火蛋射入柵內登時火起山中樹木叢雜四面皆然延及賊巢火光燭天我軍乘勢圍攻賊匪冒煙突火四路逃奔多被截殺餘皆扒山越嶺潛遁比及天曙賊巢已空查看燒死之賊約五六百人殺斃者亦數百人擒獲鄧亞喜李觀春等二十餘名逆首鄧二尺七率領悍賊百餘人奔往菱角塘之盧家村該處距三山鶴觜約四十里素與鄧逆句結我軍探悉情形卽於二十六夜星馳前往將盧村圍住盡銳急攻隨將

村外賊壘攻破殲戮多名盧村之賊知勢難抵禦遂與鄧逆及其親黨數百人翻山宵遁潛匿菱角塘後一帶山洞二十七日我軍追躡至彼查看該處悉係深山窮谷險峻異常鄧二尺七等在蔣家山洞負嵎不下並於洞外隘口安置擡槍木石以圖抗拒張運蘭覓得鄉民馮聲鑾馮上秀等令作鄉導訪悉該處山洞屈曲通行約長數里遂令分兵於洞後出路堵截仍於前面偏攻我軍鼓譟登山總兵易榮華副將賀國楨奮勇先登軍士扒山越澗而前軍功葉光先中礮陣亡各哨隊憤恨之餘勇氣百倍悉力拒戰殺賊數十人至暮該匪退入

奏疏卷三

十一

洞內我軍圍守達旦次早張運蘭令各勇多備柴薪火具填塞洞口諸處舉火焚燒該匪被煙薰火灼而死者不計其數鄧二尺七攜其幼子鄧亞保及死黨鄧亞鳳等由洞後竄出伏兵齊起一併兜擒並據英德陽山二縣各擒獲逃賊鄧亞盤鄧亞通等數十名又賊目鄧亞廣一名經署陽山縣王錫誥督同練勇格殺總計先後殲擒各匪略盡此外尚有零星餘匪皆已遠颺張運蘭隨將生擒各犯於軍前正法首要各犯委員解省稟報前來明等查連陽一帶界連數省峻嶺危灘萬重險阻從前屢爲匪徒嘯聚多歷年所前撫臣耆齡攻剿藍山

案內鄧二尺七曾經投誠給與頂戴而恃險負固蓄逆愈堅環山數十村匪類推爲渠魁以劫掠爲生積年設兵駐防因山勢險阻未能深入剿洗去冬李復猷股匪竄突連陽一帶鄧二尺七乘勢僨起初猶以謂劫盜之雄可以掩而捕之及派兵進剿其巢穴險固巖洞幽深所有山內村莊及各要隘之區皆堅築牆壘藏伏槍礮層層周密大礮火藥穀米豬牛之屬逐村屯積其蓄謀之久搶掠之多亦可想見張運蘭以得勝之師乘勢急搗縱幽鑿險盡力圍攻受傷將士至三百餘人僅能克此皆仰賴

奏疏卷三

三

聖主天威無遠弗届遂使元惡授首逋寇盪平不至蔓延爲害臣等現已飭提該首逆鄧二尺七賊目鄧亞鳳來省督同司道審明卽行正法以彰

國憲而快人心鄧二尺七之子鄧亞保及鄧亞鳳之子鄧亞生均年未及歲飭司審明照例緣坐另行咨部辦理臣等仍飭張運蘭率領所部弁勇周歷各處實力搜捕務將在逃餘匪悉數殲擒一面督同地方文武將善後事宜妥爲籌畫辦理毋令匪徒再有潛聚句結以期斷絕根株一勞永逸福建臬司張運蘭經臣等檄調來粵先後勦辦李復猷鄧二尺七兩股巨匪親督各隊兵

勇於深山窮谷中轉鬪而前躬冒矢石不避艱險迭次
出奇制勝陷陣摧堅遂使積年逋寇一旦盪平實屬勇
略過人功績卓著該司職分較崇應如何獎勵之處
等未敢擅擬伏候

皇上天恩給與獎敘以資鼓舞出自逾格

鴻施各將弁千里從征衝鋒冒鎗亦俱著有微勞記名
總兵文恆久葉明瑞易榮華劉光明均請

賞加提督銜副將賀國楨譚邦連均請以總兵記名
簡放遊擊譚發律請以參將升用其餘在事出力員弁
兵勇容_臣等擇尤另行奏懇

奏疏卷三

三

恩施以示鼓勵此次陣亡之參將銜兩江補用遊擊易
永茂把總劉明輝及前次陣亡之守備熊萬隆仰懇
天恩先行交部議恤其餘傷亡弁兵勇練人等集冊咨
部分別恤賞_臣等謹合詞由驛馳陳伏乞

皇太后

皇上聖鑒訓示謹

奏

官軍追剿陽春客匪連戰大捷疏

會總督銜

奏爲官軍追剿陽春客匪連戰大捷恭摺由驛馳陳仰

祈

聖鑒事竊廣東客匪屯聚肇慶府陽春縣屬之金堡企
壩一帶勾結髮賊四出滋擾逼近陽春縣城先經守備
侯勉忠等堵剿獲勝因賊勢甚眾未能剋日殲除詎等
飛調署羅定協副將卓興由高州拔營赴援前經
奏明辦理在案該匪迭次撲犯陽春縣城均經守備侯
勉忠會同地方文武官紳奮勇擊退先後將黃泥峽白
木橋十二排坡潭水等處村莊收復嗣據署羅定協副

奏疏卷三

四

將卓興稟報由高郡移駐陽江縣屬之織笈地方復進
紮雙捷墟河旁正月初四日該匪率領大股突往撲營
漫山遍野由河東西分兩路擁至勢極洶涌卓興分部
隊伍嚴陣以待欲俟其半渡擊之並於陸路分兵互相
援應外委陳仕不遵號令先自帶勇渡河干總黃崇光
止之不及亦相率競渡爲匪所乘不能抵禦遂致敗潰
外委周忠海力戰捐軀並陣亡壯勇十九名千總許加
晉身受重傷此外尚有被傷隊勇多名千總黃崇光隨
督所部奮勇扼重堵截方得收隊卓興憤怒亟分兵兩
隊往河西一路迎戰自率大隊由河東繼進吶喊而前

所向披靡該匪抵敵不住大敗奔逃我軍四面包鈔殲斃無算其渡河溺死者以千計追殺至二十里外屍橫遍野斬取首級二百顆內有偽營官二名搜出偽印二顆生擒十一名奪獲旗幟器械馬匹多件卓興因外委陳仕不遵號令輕進取敗卽按軍法立斬以徇于總黃崇光雖亦違令擅進而能轉敗爲功尙有可原將該弁棍責摘頂以觀後效是日都司蔣朝剛督勇在金缸嶺一帶堵截陣斬賊目一名生擒二名追至樟木灣沿途斬戮及落水淹斃者甚多割取首級五顆耳記二隻並獲器械多件初六日該匪復分股由雙捷河西前來挑

奏疏卷三

五

戰另有悍賊數百名突近雙捷墟口卓興出隊擊之追殺數里慮有設伏收隊而回該匪竄至地豆岡復被都司蔣朝剛截殺生擒賊目二名殲賊甚夥初七日匪首戴梓潰等親率大股廬至卓興分兵五路兜剿該匪面面受敵力不能支被我軍陣斬多名大敗奔北自相踐踏死者無數追至那旦地方將賊巢三座悉行攻破巢內輜重舉火焚燬救出龍溪寨被困民萬餘口割取匪首二十七顆奪獲旗幟器械多件卓興隨以半軍畱守雙捷自領餘隊馳赴麻汕以遏賊匪竄撲陽江縣城之路適聞該逆攻撲遊擊雷秉剛都司蔣朝剛所紮牛

場沙中橋各營礮聲不絕相持甚急卓興卽由麻油出其後鈔擊該匪不虞此軍猝至不敢拒敵紛紛退竄雷秉剛等亦帶隊協剿初八九兩日連戰大捷殺賊數百名乘勝直追至塘角墟等處將該處匪巢攻燬斬獲匪首一百一顆生擒四名奪獲大旗擡槍等件外委莊富發奮勇當先手刃騎馬賊目二名割取首級旋中伏礮陣亡受傷壯勇十八名該匪連次挫衄勢已窮蹙奔回雞籠門金堡企勒等處卓興於初十日帶隊進抵陽春縣屬古良水口等情據各將備稟報前來臣等伏查客匪勾結髮賊屯聚陽春據險負隅歷時已久自信宜克復後高州各處敗匪復以該處爲逋逃藪是以愈集愈眾臣等前調卓興一軍專辦此股客匪以口糧欠放甚鉅遷延多日至去年十一月內始能移營陽江縣屬之織篲其時陽春告急匪勢方盛卓興按兵觀變伺隙而動乘初四日一戰之威節次掃蕩使賊勢不至猖獗該副將行軍素有紀律每次接仗謀勇兼資出之以鎮定收斬不遵軍令之外委陳仕尤爲近時將兵者所難及現在剿辦陽春陽江客匪事宜應卽責成該副將一手經理其駐防陽江之都司蔣朝剛一軍駐防陽春之守備侯勉忠一軍應併歸該副將節制調遣以一事權俟

剿辦略有頭緒必將戴梓潰李四白面豬各匪搜除淨
盡再行察看情形遵照前

旨將各老弱良善之客民妥爲撫綏庶幾一勞永逸用
以仰慰

宸廑此次陣亡之潮州鎮左營外委五品藍翎周忠海
潮州鎮中營外委藍翎儘先千總莊富發臨陣捐軀殊
堪憫惻懇請

敕部從優議卹以慰忠魂其餘傷亡弁兵壯勇容俟確
查另行彙案咨部覈辦所有剿辦陽春客匪迭獲大勝
情形臣等謹合詞恭摺由驛馳陳伏乞

奏疏卷三

七

皇太后

皇上聖鑒訓示謹

奏

據實舉劾以肅官方而蘇民氣疏

會總督銜

奏爲據實舉劾以肅官方而蘇民氣恭摺仰祈

聖鑒事竊查廣東吏治不修積時已久民情之扞格盜賊之橫行幾爲意想所不能測自古世治則正氣必昌世亂則戾氣先積在官爲紀綱法度在民爲風俗人心皆可以察其陰陽消長之機以知治亂之本廣東戾氣之充塞正氣之微茫至今日而已極官民之氣不交而更加之錮蔽義利之分不辨而益獎其貪邪人第知民俗之頑梗視他省爲強而不知民情之鬱結亦視他省爲甚不及此時勤求吏治疏通民氣萬無可以支持之

奏疏卷三

六

理臣等博採輿論細心體察考求貪廉之實蹟以明勸懲之微權期使宦途之趨向日端庶可漸次破除積習力挽頽風查有虎門同知補用知府吳寶誠廉靜精詳需次多年於廣東氣習毫無沾染所至皆有遺愛署龍川縣知縣准補饒平縣知縣鄭夢玉清操實政勤幹練達在龍川辦理老隆積匪一清積年行旅之患鄰縣紳民同聲歌誦無異辭署東莞縣知縣候補同知吳經采砥節礪行志趣甚遠在東莞清釐積案裁革陋規事事講求本原足以挽回風氣卸署連山廳綏徭同知候補同知韓鳳翔廉惠慈祥在連山七年民猶愛戴匪徒斂

戡循循如老書生而遇事推求具有定識定力以上四員才品兼優吳贊誠應請

飭交軍機處記名遇有廣東知府缺出請

旨簡放鄭夢玉吳經采韓鳳翔均請以同知直隸州儘先題補又連州直隸州知州嚴先佑穩實老練整頓地方風俗堅強耐勞署澄海縣知縣題補番禺縣知縣孔昭浹才優守潔練達有爲鎮平縣知縣調補順德縣知縣龐掌運靜鎮安詳能使民服其教匪類爲之斂迹署羅定州知州准補長樂縣知縣周士俊遇事細心講求歷署縣事皆有循聲署清遠縣知縣准補新興縣知縣

奏疏卷三

九

李文烜惻幅無華潔清自好准補增城縣知縣劉光遠素著清名一塵不染李文烜前署澄邁縣劉光遠前署文昌縣據地方紳士言海南數十年清廉之官無及此二員者以上六員或辦事勤能或廉名特著嚴先佑應請以知府儘先升補孔昭浹龐掌運周士俊李文烜劉光遠均請以同知直隸州升補再查有署雷州府知府朱德澄性情乖張不勝表率候補歸善縣知縣定啟縱容家丁昏庸貪鄙准補興甯縣知縣郭溶趨向不端難膺民社候補知縣伍中翰行止卑污有玷官箴以上四員應請卽行革職又候補同知甘槐私累太重難期有

守候補知縣方鑑源年力衰邁才具平常以上二員應請勒令原品休致所有應舉應劾各員經_臣等與藩臬兩司核實訪察聞見相同不敢不據實陳

奏以期稍裨官方疏通民氣仰副

皇上勤求吏治之至意是否有當伏乞

皇太后

皇上聖鑒訓示施行謹

奏

奏疏卷三

三

請 獎擢拏獲巨盜之都司守備片

會總督銜

再廣東劫盜肆行無忌其著名大頭目黨羽或聯數府縣交通句結盤踞甚深臣等蒞任之初訪知東莞縣屬大壩墟盜魁葉烏欖頭黨羽甚多大爲民害當密劄營縣設法拏辦未數日而附城西榮巷時昌銀店被劫拏獲首犯陳亞積李亞松等多名又數日而城內清風橋廣裕銀店被劫拏獲首犯吳亞先葉華仔等多名臣等以會垣劫案一歲中至三四次之多必有著名積匪潛伏句通密加考覈廉知兩案均葉烏欖頭爲首蓋廣東大弊在本地土音不能通知每遇劫案巨盜差役自度

奏疏卷三

三

不能捕獲卽先隱其名是以盜首愈縱而愈橫盜民亦因之愈熾葉烏欖頭一犯經劄營縣訪拏之後竟敢潛匿省城連次行劫而仍無舉其名者劫盜之橫行紀綱法度之廢弛均可想見因查署廣州協中軍都司題補三江口協中軍都司保應熊補用守備廣州城守營千總鄧安邦緝捕素稱勤能卽經密飭嚴拏葉烏欖頭務獲到案並語以獲犯優保否卽參辦該二員往來奔馳經營數月節次招集練勇設法購緝自去年十一月至今始將葉烏欖頭拏獲當於會訊後恭請

王命先行正法以昭炯戒其餘要犯除吳亞先葉華仔

等外續經拏獲哨身仔沙樓全蕭亞保何亞通陳亞名龍亞江黃亞安周華支何九仔等多名正法省城街道略爲之肅清數月未犯劫案似此積年巨患設法捕除人心稱快而該二員於奉委後並先後拏獲別案疊次行劫要犯李亞會劉亞坤劉亞妹梁亞禮黃志三賴亞旺梁亞堅樊亞金樊亞祖樊綿羊蘇樊運通周亞富黃亞作李幹等至十四名之多皆係著名巨盜洵屬緝捕認真奮勉出力與尋常巡緝盡職者實有不同合無顯懇

皇上天恩破格獎擢都司保應熊應請以遊擊儘先補

奏疏卷二

三

用候補守備鄧安邦咸豐五年克復和平縣案內經提臣崑壽擬保都司賞換花翎訖未出奏應仍請以都司升用

賞換花翎臣等爲整飭捕務起見可否

飭部照准之處出自

皇上逾格鴻施謹會同提臣崑壽附片陳奏伏乞

聖鑒謹

奏

請 獎拏獲鄰境要犯人員片

會總督銜

再署南海縣知縣候補同知羅澣隆居官廉謹素有聲譽此次拏獲東莞盜犯葉烏欖頭等多名該署縣懸賞購綫籌給經費出力為多又代理化州知州試用知縣張欽泰前於搜剿信宜餘匪屢次稟報情形遇事敢為具有條理嗣石城縣正豐店被劫案內該代牧拏獲要犯方良周點謝亞初吳強郭亞意鍾效妹陳滿等七名解歸石城縣併案辦理當以該員辦事認真密札高州府知府蔣超伯就近查詢其官聲據該府稟稱信宜股匪竄擾州屬寶墟時該代牧保守州城獨力經營後信宜周坑股匪滋擾該代牧復能派勇三百名赴信宜助剿其勇糧經費一由局紳勸捐經理絲毫不染操守亦見清潔以上二員可否援照拏獲鄰境要犯之例均請加恩以本班儘先補用出自

皇上天恩其張欽泰化州守城接仗勞績仍應彙附信宜保案另獎以昭激勸謹附片陳

奏伏祈

聖鑒謹

奏

保獎獲盜人員懇酌量變通並陳廣東治盜情由片

會
總

督
銜

再臣等於同治二年十二月十一日接准部咨同治二
年九月初六日內閣奉

上諭駱秉章奏請將獲盜人員仍復送部引見舊例等
語向例獲盜人員俱係交部分別議敘即所獲盜犯較
多亦止於送部引見自咸豐五年部議章程凡獲盜人
員有拏獲斬梟斬決一案六名以上或兩案三案每案
均在三名以上者勿庸分案議敘俱准督撫核實保奏
給予應升官階免其送部引見原以四方多故盜賊橫

奏疏卷三

三

行獎勵不妨稍優庶緝捕可收實效乃自此例一開獲
盜請獎之案層見疊出其認真緝捕者固不乏人而詐
偽日滋或竟徇親友之請託以盜犯相贈遺在予之者
以首先獲盜讓人邀功而自居協獲仍免處分在受之
者毫無勞績優獎倖邀似此夤緣爲奸巧於干進殊於
吏治有礙嗣後獲盜人員仍照舊例送部引見其由督
撫指定官階專摺保奏章程著即停止以杜倖進而重
名器欽此仰見

皇上循名核實慎守舊章之至意臣等前劄飭都司保
應熊守備鄧安邦緝拏要犯葉烏欖頭尙在未奉部文

之前廣東節次辦理軍務臨時應許給與獎敘事後於
應獎各員遺漏常多人皆以在官之言無足憑信臣等
方謀力矯其弊又親見保應熊等經營賠墊多獲巨犯
與尋常緝捕情形有別不敢不據實

奏懇

恩施以稍資鼓勵抑臣等更有請者

國家立法獎能懲奸而已權衡緩急輕重之宜考求虛
實情僞之辨責在督撫督撫喜賞緣何途不可巧進督
撫重名器何事可以倖邀咸豐五年部議獲盜給與優
獎章程專爲整飭捕務起見亦以軍興以來保獎人員

奏疏卷三

三

百倍平時而寇亂之興其原多起於劫盜得一捕盜之
員吏亦足以稍遏亂萌若但令送部引見徒使奔走煩
費無益於升階在平時循資濡滯得之自以爲榮在此
時保案紛繁得之反以爲苦恐并獲盜議敘一節亦成
虛文值此寇亂方張之日吝一階之賞阻人以可圖之
功是直視此時捕盜反輕於平時也駱秉章所奏或四
川有此弊端欲以概之天下臣愚以爲尋常盜案雖至
斬梟斬決原可無庸保獎至或舉發巨案或拏獲著名
大盜核其勞績幾與戰功無異似仍應酌量給予優獎
俾有所激勸應請

旨敕下部

臣

另議具奏略與變通於捕務不無裨益

臣

等又見鈔報戶科給事中王憲成奏刑部纂修條例有應行參酌者四條其第一條辦理盜犯新章宜稍加區別等語

臣等查刑部賊盜原律凡得贓者不分首從皆斬敬繹律文豈不知情節各有重輕而斷以一語以防治刑者之意爲高下亦緣賊盜糾眾行劫罪本無可道也雍正五年九卿定議分別法所難宥情有可原纂入例冊乾隆二十六年復經刑部議夥盜轉糾黨羽俱擬斬決不得以情有可原聲請其時海宇綏和法令修明朝廷仁政得以下究而固不肯稍寬有罪以示有所姑

息

奏疏卷三

三

列聖之心先後同符竊見近數十年州縣辦案不惜磨難平民而憚於懲辦匪類遇有盜案設法解脫遂使無形之中善氣日益消磨惡氣日益增長以釀成今日盜賊之患

文宗顯皇帝知其流弊於辦理劫案一依本律問擬胡林翼巡撫湖北張亮基駱秉章先後巡撫湖南皆以懲辦盜賊匪類振興百姓之氣而各州縣狃於積習反覆沈錮避重就輕改盜爲竊仍所不免至於廣東盜風之盛尤非各省情形可比

臣等檢查案卷比較情實嘗以

爲疑迨經採訪民情始略知其梗概蓋廣東民氣素強嗜利輕生乃其本性盜賊之多百倍他省州縣防劫盜處分先於報案時勒令改輕情節又遞呈有費行票有費勘案有費百計困苦之而賊犯終無一獲愚民苦需索之擾相率容忍不敢報案其力能具控者或因捕獲一犯牽引數案勉強成讞以圖寬免處分積之久而著名大盜皆能自脫於法於是差役可以庇盜矣紳士可以夤盜矣互相勾結悍無顧忌猶恃律文不分首從皆斬一語非捕獲夥黨數人不能了案若如王憲成所奏除首盜一二名外其餘夥黨皆屬可原將益開州縣自

奏疏卷三

七

便之門以成差役縱盜之計且查廣東劫盜傷斃人命者十九其不致斃命者十一緣凡爲盜者人各挾一洋槍藏一順刀事主畏伏藏匿方能幸免於死臣等檢閱各州縣詳報盜案於傷斃人命一節必稱事主尾追被落後一賊拒捕斃命是卽傷斃事主重情亦不過歸併爲首一二人含胡問抵新章如此從嚴州縣猶不盡遵照若再加輕減是未經傷斃人命雖懷殺人之具嚇禁強奪皆可援照迫於飢寒得財而未傷人概邀寬典鼠偷狗竊可云迫於飢寒夥眾行劫殺人放火以爲飢寒所迫可乎又接贓與接贓把風爲事不同爲盜一也如

葉烏欖頭連劫省垣重地所供要犯十餘人未經拏獲者僅連亞幅葉成濟葉幅三犯而供稱連亞幅亦係盜魁極有勇力每次劫案派令把風是把風接賊有時罪更浮於接賊必欲以

國家寬大之恩施之盜賊竊以爲非宜

臣

等每次會訊

盜案於爲首要犯反覆研訊時不免懷疑故常以爲加恩盜賊莫如加恩承緝盜賊之文武官吏使之不爲處分所累有餘力以求真盜若復於刑部原律加入情有可原一條是盜賊殺人官吏莫之能禁官吏殺盜賊例文反能禁之以此行之休養無事之時則可以此行之

奏疏卷三

三

今日則不可以此行之他省猶可以此行之廣東則大不可是以今日治盜有從嚴無從寬有速斷無久稽非直寇亂方急宜求禁暴之方醞釀太深尤爲救弊之術亦律文本意固如是也又賊盜與被脇從逆之犯情形實有不同被脇從逆者罪重而情實可矜盜賊行劫誰從脇制之非負性兇強何至懷刃肆行搶掠廣西之逆匪河南之捻匪無一不起於盜賊故盜賊匪類同科而必不可與被脇者同科但願矜恤盜賊則愚民百姓之氣益將鬱而不申

臣

等實不忍

文宗顯皇帝除暴救時之心又誤於書生之見致辦理

多所滯礙不敢不竭其狂愚先事具陳籲懇

皇上天恩並將^臣等摺片交刑部核議或亦不無萬一

之神以上二條皆於廣東治盜情由尤有關繫謹附片

縷陳伏乞

聖鑒謹

奏

奏疏卷三

籌辦邊防先清內匪片

會總督銜

再花旂股匪林正揚由廣德州竄擾江西兼及閩境探聞汀州之甯化甯都之石城皆有賊蹤廣東此時邊防又以嘉應州爲急_臣等前飭福建臬司張運蘭一軍移紮南雄防堵贛甯一路署三江協副將方耀一軍移紮嘉應防堵甯都汀漳各路通計嘉應州屬之鎮平與上杭交界迤東至潮州之大埔州屬之平遠與江西長甯交界迤西至惠州之連平計程六七百里皆并匯於東江爲東路邊防方耀一軍勢難分布因令潮州鎮總兵翟國彥挑選本標精兵數百名馳防大埔惠州協副將

奏疏卷三

三

施溥挑選本標及提標精兵一千四百名分防嘉應又飭虎門同知補用知府吳贊誠督同紳士廣西候補知府張其翰福建沙縣知縣楊元勳等辦理沿邊團練現在江浙各府縣漸次肅清賊之流毒必及廣東而其大患尤不在外寇之攔入而在內匪之潛藏此股花旂賊匪皆籍隸惠州嘉應在在可以句結咸豐四年紅匪之亂三十餘縣姦民一時蠶起賴省庫充盈軍餉易於籌措得收戡定之效其後搜捕餘匪近省各縣辦理至數萬人而惠潮嘉各屬終以兵力不及未能懲辦各處匪鄉建造礮樓圍牆村村相望恃強爭勝此時清釐吏治

設法消弭尙可不至無故蠢動若驟有外匪攔入內地
伏匪乘機響應又當山窮水盡羅掘四空之時必致瞻
顧旁皇智勇俱困查嘉應一帶民氣强悍張其翰楊元
勳等又經屢次辦團接仗爲地方所信服應及此時鼓
勵紳民免致盡流爲盜賊亦使各路兵勇聲氣聯絡總
期遏賊於境外不令深入構禍邊防庶稍有可恃謹將
辦理防剿緣由略陳梗概伏乞

聖鑒謹

奏

奏疏卷三

查明廣東咸豐九年以前各州縣民欠地丁錢糧本折

米各數目疏

會總督銜

奏爲遵

旨查明廣東省咸豐九年以前各州縣民欠地丁錢糧本折米各數目開列簡明清單恭摺具

奏仰祈

聖鑒事竊照同治元年三月十三日接准戶部咨議覆御史朱夢元奏請蠲免各省歷年積欠錢糧一摺擬遵照道光十五年

恩詔豁免十年以前民欠道光二十五年

奏疏卷三

三

恩詔豁免二十年以前民欠成案所有各該省民欠咸豐九年以前錢糧凡已題報奏銷到部者督飭司員將各年實在民欠案冊查明一面行文各該督撫將各該年應徵錢糧實在未完若干並緩征若干據實具奏並造具細冊送部以憑將實在民欠概行豁免其現在有軍務省分九年以前民欠地丁錢糧奏銷到部未齊者應請

皇上特沛恩綸一概准予豁免仍令各該督撫先將完善各州縣歷年應征錢糧某年已完過若干實在民欠未完若干查明具奏並造冊報部其餘未收復地方一

俟克復後亦卽詳查造報以憑奏請豁免如此分別核辦庶幾事有實濟

恩不虛施等因同治元年二月初七日具奏本日議政王軍機大臣奉

旨依議欽此又准戶部咨議覆河南巡撫鄭元善直隸總督文煜等奏民欠漕項雜稅等項一律豁免一摺同治元年六月十八日具奏本日議政王軍機大臣奉

上諭戶部奏遵議直隸河南民欠漕項請予豁免一摺直隸河南省咸豐九年以前民欠漕糧雜項前經文煜鄭元善先後奏請豁免當交戶部議奏茲據奏稱核與

奏疏卷三

三

辦過成案相符所有咸豐九年以前直隸等省民欠出借倉糧籽種口糧牛具漕項葦課學租雜稅等項准其隨同錢糧一律豁免卽著文煜鄭元善查明實在民欠之項查照辦理毋任稍有弊混其因災緩征九年以前漕糧並民欠未完常漕倉穀著一併豁免以紓民力該督撫卽刊刻謄黃徧行曉諭務使實惠均沾毋任吏胥舞弊用副朝廷軫念民依至意餘依議欽此當經前督撫臣先後飭行藩司確查民欠實數一面敬謹謄黃先行頒發各屬徧行曉諭務使城鄉僻壤無不周知以杜影射侵欺之弊嗣據各屬陸續開造民欠清冊到省經

前司道查核舛錯甚多恐有捏混情弊移行該管各道府州弔查所屬徵收紅簿覆核更正加結轉詳旋因賊踞信宜分擾鄰邑各屬力籌防剿支應兵差土客擾害之區各地方官彈壓撫綏亦復刻無暇晷以致年餘之久應造冊檔不及次第清楚_臣等抵任適值廣海信宜克復當卽嚴飭各屬趕緊查報以期早日推廣皇仁惟是自前屆奉

旨豁免道光二十九年民欠以來時越十年款目紛繁查辦旬稽急切本難清理而實欠在民與徵存在官尤不容稍涉含胡經_臣郭嵩燾於上年十二月間將飭

催查辦緣由附片奏

奏疏卷三

三

聞在案茲據藩司吳昌壽督糧道郭祥瑞催據各道府州將所屬各州縣歷年民欠銀米實數查明開列詳報前來_臣等覆查粵東省額徵正雜錢糧並無漕項葦課名目近年亦未出借倉糧籽種口糧牛具其雜稅年清年款向無民欠學租由紳衿捐置爲貧生燈油之資與別省學租不同向不歸案請豁計應查辦者止有地丁本折米石兩項茲查得自道光三十年起至咸豐九年止民欠及緩徵未完地丁備支正銀九十八萬三千五百一十五兩零耗羨銀一十六萬六千二百一十四兩

零又未完本折米一十六萬八千七百九十六石零耗米二萬七千七石零以上未完民欠地丁備支正耗銀兩及本折正耗米石委係實欠在民及緩徵未完之項飭據各該道府弔查所屬紅簿纖悉相符並無將完作欠情弊由藩司糧道核明造冊詳繳到臣等覆核無異除飭司道嚴催各州縣將未經奉文以前徵存地丁正耗銀兩本折正耗米石迅卽追提找支各營積欠餉糶其請豁無徵不敷折支之數亦飭另行籌辦分別造報並將藩司糧道造繳歷年民欠地丁備支正耗銀兩暨本折正耗米石原冊咨部一面另繕清單咨送軍機

奏疏卷三

三

處備查外

臣等謹合詞恭摺具

奏並繕簡明清單敬呈

御覽伏乞

皇太后

皇上聖鑒敕部核覆施行謹

奏

官軍追剿客匪髮賊迭獲全勝生擒賊首餘匪竄散現
飭委員察看情形分別辦理疏

會總督銜

奏爲官軍追剿客匪髮賊迭獲全勝生擒賊首餘匪竄
散現飭委員察看情形分別辦理恭摺由驛馳陳仰祈
聖鑒事竊粵東客匪旬結髮賊屯聚陽春縣屬之金堡
企壩等處正月初旬署羅定協副將卓興等各軍進剿
連戰大捷經臣等於正月二十八日會摺

奏報在案卓興自移紮陽春縣屬古良水口之後探悉
該匪分竄陽江縣屬那旦地方隨督率所部跟蹤追躡
正月十三日卓興會商署陽江縣徐寶符與都司蔣朝

奏疏卷三

三

剛等及紳士前任山東青州府知府譚伯筠帶領兵勇
由河邊右路進攻該副將分撥隊勇由龍溪堡左路夾
擊自率大隊居中調度匪眾左右衝突被我軍層層包
裹陣斬五百餘名割取首級十顆奪獲旗幟多件正酣
戰間風雨交作槍礮難施該匪乘間免脫次日午後復
大股蜂擁而來卓興會合陽江官軍暨署陽春縣吳璇
在籍刑部候補主事劉承輩等各練勇奮力迎擊該匪
見我軍勢猛不敢拒敵扒山越嶺逃回金堡等處老巢
嗣是連日大雨不能進兵至望後稍霽卓興隨與春江
三縣官紳馳往雞籠門相機進剿賊匪於金堡企壩雞

籠門一帶內踞瓦屋外搭篷寮數十里內碁布星羅填滿山谷十七夜卓興遣人潛往金堡用火箭射入賊巢登時火發匪眾不及提防踉蹌撲救並分黨拒敵被我軍擊殺多名十九夜復往雞籠門如前縱火並預撥各隊分向金堡企塙水陸夾攻首尾相應該匪負夜慌亂被我軍破柵直入譁然驚潰自相踐踏斬馘甚多金堡企塙兩處隊勇亦各乘勝進攻該匪膽落心寒不能復成隊股四散奔突且戰且走各匪巢同時火起到處皆然我軍勇氣百倍直至天曉所殺不可勝計當將雞籠門金堡企塙收復賊匪遂由潭水坡仔一帶奔竄卓興亦進紮潭水因天雨連縣路塗泥淖休息士卒二月初五日匪黨漫山遍野前來撲營卓興與各練勇分作三路禦之該匪布陣拒敵先與中路接仗賊目數人手執大旗率隊向前勢甚兇猛我軍施放槍礮無不應聲而倒餘眾披靡大敗奔逃其左右兩隊亦同時敗潰被我軍合圍包鈔殲斃不下千人追殺二十餘里至白馬徑一路屍橫遍野我軍直趕渡河始行收隊計斬獲首級二百餘顆生擒十名奪獲大旗擡槍洋槍多件匪黨有分竄鳳南白馬新墟者又被守備侯勉忠等沿途追殺多名該匪隨在陽江三甲雙窖等處山險屯聚初七日

卓興由潭水進攻三甲至荆山徑口該匪一路密釘竹籤以阻官軍進攻之路卓興揮軍拔釘前進直至三甲雞頭塘與該匪柵壘相近卓興督率各軍鼓勇而進槍礮齊施該匪紛紛四散登將三甲墟收復餘匪向新樓西岸山坪竄去復經侯勉忠由龐垌小路繞道截擊生擒僞先鋒馮新養等五名初八九等日復連攻新樓西岸各處匪巢陣斬僞帥尉黃煥新一名將賊巢悉行焚燬該匪由黃潼河一路竄往東安縣屬之風洞長沙及信宜縣屬之分水錢排等處卓興訪聞匪首曾白面豬潛匿陽春縣屬之上村親督大隊前往圍捕卽將該首逆擒獲一面解省審辦一面分兵追捕餘匪等情據卓興及各營縣稟報前來臣等查客匪盤踞陽春縣屬之金堡企壩時閱數年根深蒂固又復勾結髮逆擾害地方攻撲城池其勢已成燎原現經卓興會合侯勉忠蔣朝剛等軍及陽春陽江二縣練勇迭次攻剿獲勝焚燬老巢擒獲匪首曾白面豬足以少示懲創但臣等初意擬於痛剿之後卽將各路土匪分別搜剔其頑梗以爲設法安插地步乃該匪復因被剿窮蹙分竄信宜東安所屬各處查信宜久爲賊擾民生凋殘元氣本難驟復且與西省容岑各縣相距匪遙其間新撫之眾觀望

徘徊心懷疑懼一二不逞之徒亦復時相煽誘雖經屢
飭地方官並加派道員會同設法鎮撫而清還占產解
釋積仇一切尙費周章設使此次客匪相與句串聯合
恐又成屯踞蔓延之勢臣等疊咨廣西撫臣並分飭東
西連界各文武一體堵截搜捕復札飭侯勉忠等軍繞
出信宜迎頭截擊現據稟報該匪因不得西竄又折回
東安之富霖洞新甯之天黨墟爲苟延殘喘之計當檄
飭卓興一軍駐紮陽春以防回竄仍令相機進剿懾以
兵威一面派委候補知府史樸攜帶告示馳往剴切曉
諭乘其流離顛沛創鉅痛深之餘易於感動期使服罪

奏疏卷三

三

畏威如將土匪戴潰梓等網送大營卽當會同地方官
將現存丁口開造清冊體察各該縣情形設法安置庶
幾一勞永逸用以奠民命而廣

皇仁除俟辦理能否確有把握再行馳報外所有勦辦
陽春陽江出力各員弁紳勇人等著有微勞可否由臣
等擇尤酌保以示鼓勵出自

天恩先後傷亡各兵勇飭行確查彙案咨部賞卹是否
有當臣等謹合詞恭摺馳陳伏乞

皇太后

皇上聖鑒訓示謹

奏

肇慶土客一案卓興陽持勦客之義而陰與之比督
轅一意私徇卓興交相爲利而已此等奏案把筆欲
獻督轅輒多加鋪張之詞能無感喟

奏疏卷二

四

花旗股匪有回竄粵東之意張運蘭暫難赴閩片

會總督銜

再臣接據探報金陵逆賊偽侍王李世賢分大股上竄

其前隊廣東花旗股匪已由浙境繞越江西之廣豐王

山漸及撫州建昌地界擒獲賊探供稱該逆有回竄粵

東之意臣查咸豐六年廣東紅匪大股竄擾吉安袁臨

數十萬人會石逆達開至臨江句降其眾另編花旗股

匪本在廣東肆擾多年之眾其黨羽散歸者亦數萬人

時虞蠢動前聞侍輔諸逆有由福建江西回竄廣東之

說臣等度該匪乘間上竄爲浙蘇皖三軍日加逼臨其

勢已極窮蹙糧道亦漸憂斷絕分股肆擾出險求生亦

奏疏卷三

三

足掣動官軍進規杭湖之勢以大勢論之江楚當防其

竄擾未必遠及廣東及聞侍逆大隊爲浙師所截獨花

旗及沛逆一股裹糧疾馳先期竄入江境是此股賊匪

本無定向又非若侍輔諸逆與金陵有相維繫之心其

回竄廣東句結黨羽以圖一逞亦情勢所應有粵東伏

莽遍地皆是前此李復猷一犯邊界卽有鄧二尺七起

而應之一經句結必至蔓延尤不可不早爲之備現在

兵勇惟卓興一軍屢立戰功而至今尙爲客匪所牽難

於撥調其足備堵剿之用者僅有張運蘭所部之湘勇

三千人臣等現已檄飭張運蘭移紮南雄州探明賊蹤

緩急情形相機辦理兼顧韶南一帶邊防如賊已占踞城邑則當越境助剿以期聚殲此股不使滋蔓若第伺閒狂奔勢成流寇則且穩守門戶以免歧出之虞而蹈尾追之失惟張運蘭一軍剿辦三山鶴背後陽山英德翁源乳源各縣紛紛稟請撥兵搜捕積匪張運蘭移紮青蓮墟安立老營自率三旗馳抵英德之石街專辦馮九指一股其菱角塘蔣家洞墩口鄉各處方謀次第剿辦一經調赴南雄恐各匪乘勢嘯聚反致滋生事端復飭四川候補知府劉德謙管帶信字營移紮樂昌以資鎮壓仍飭添募楚勇三千人期與張運蘭一軍相爲犄角以厚其勢亦可分撥搜剿各處伏匪其嘉應州一路毗連福建江西兩省道路分歧擬飭署三江口協副將方耀挑選所部潮勇三千名駐紮鎮平兼顧平遠大埔邊防其餘不甚得力者卽飭遣散回籍以節糜費正在籌畫間接准浙閩總督臣左宗棠來咨飭令張運蘭挑選所部二三千人馳赴福建臬司本任臣查福建屢經賊擾終不得一逞其山嶺重疊俗悍民貧野無所掠賊亦不願屯踞卽據左宗棠來咨稱獲賊探均有回竄粵東之語閩境卽被賊擾亦不過藉境以趨廣東無及此時舍粵趨閩之理福建當先調集諸軍截其入境之路

粵東募勇苦無把握應仍行添募楚勇片

會總督衙

再粵東軍務積弊太深驟難振作綜其大要約有數端
一曰募勇全無限制召募之始從無點驗編立營哨或由數百人添募至數千均據一稟爲憑一營積欠口糧多至數十萬無能言其端委者虛浮冒濫視同兒戲莫知其非其弊一也一曰召募但顧虛名湖南之鎮守勇廣東之潮州勇均號稱強悍湖南守城一次見鎮守勇之剽掠不服約束解圍後卽行遣散嗣是湖南勇攻剿徧天下從未一開募鎮守營廣東潮州及廣州屬之東莞其民皆剽悍輕生習爲劫盜歷來募勇專意潮州東莞散而爲賊收而爲勇更迭乘除不知鑒戒其弊二也一曰招降太無章程每次股匪滋事阻山負險經年累歲抗拒官軍竭盡兵力辦理稍有端倪輒以約降了事始而投誠免罪繼而怙眾邀恩多或數千少或數百錄其渠魁使爲營將相率以舉兵稱逆爲進身之階湖南管帶營勇者十九皆儒生廣東管帶營勇者十九皆降將旣非約束整齊之師紀綱法度亦因以不能復振其弊三也一曰將弁無所取法帶勇各員多擁重賞視爲罔利之具勇糧任意折扣亦不禁其剽掠卓興一軍紀律較嚴亦尙穩實能戰臣等蒞任後發給高州大餉一

二次外每月仍按解其軍餉銀二萬而猶以餉糈不足不受調遣固由薄視諸將恃己傲物致近於驕蹇實亦潮勇之難於駕馭藉口持其短長故當從前繁盛之時優賞浪費各將弁歆於厚利尚可資其一戰餉糈愈絀則督率愈難其弊四也臣等亦知就地擇才係屬正辦廣東民俗强悍尤易鼓舞其銳氣以利攻勦而旁皇四顧無可恃之將無可信之勇使能驟籌餉銀數百萬盡數散遣舊勇按照楚軍營制編立哨隊約束訓練從新整飭未嘗不可一新壁壘使成節制之師而舊欠既多營勇尤雜張皇補苴因簡就陋日思漸次籌餉一批卽撤遣一營而力猶苦不給仍用其舊則當大敵而必不能支另招新勇則求良將而苦無可試且此間充當勇目者多與各股賊匪聲息相通官軍勝則設法約降賊匪勝則潛謀從逆本難恃以自衛而此股紅匪黨羽眾多尤恐句結貽害臣等初聞江西警信卽謀調撥張運蘭一軍越境迎勦而環邊千餘里無可應調之軍驟有緩急將至束手無策故不能不飭劉德謙添募一軍以資調遣急則備本省攻戰之需緩則爲分軍越勦之舉雖不免稍有煩費而審度事勢之宜通籌數省之局有不能不出於此者所有粵東現在募勇苦無把握應仍

行添募楚勇緣由謹附片密陳伏乞

聖鑒謹

奏

奏疏卷二

吳

欽奉 寄諭謹將前後擬辦情形縷晰密陳疏

奏爲欽奉

寄諭謹將前後擬辦情形縷晰密陳仰祈

聖鑒事竊^臣等於本年正月十四日承准議政王軍機

大臣字寄同治二年十二月十四日奉

上諭羅惇衍奏劣紳勾通外國勒還巨款請收回印票以杜後患一摺據稱已故布政使銜候選道伍崇曜捐輸銀三十二萬兩誘與咪國要在粵海關索本息銀四十七萬餘兩今該紳已於十月二十四日病歿恐海關原給印票一落於咪夷之手則持據來索又費唇舌且

奏疏卷三

三

釀事端請令兩廣總督察看妥辦等語廣東紳士伍崇曜前代籌銀三十二萬兩據云借自咪國並需息銀十五萬兩前經晏端書奏請由粵海關稅項下陸續給還當經總理各國事務衙門戶部議由廣東現任督撫飭令伍崇曜先行倡捐並於通省商富內勸令一體捐輸歸款業經有旨允准茲據該尚書稱伍崇曜身故恐海關印票一落外國之手諸費脣舌所籌不爲無見此項銀兩無論借自何人總以速行歸款爲安著毛鴻賓郭嵩燾毓清查前項銀兩曾否勸捐歸補陸續清還現在尚欠若干能否令伍崇曜子弟自行籌補若干其不敷

者官爲勸捐清結惟海關印票總以先行收回爲最要之著免致味國執持原券致多饒舌該督等務須妥速籌商預弭後患是爲至要原摺著鈔給閱看將此諭令知之欽此仰見

聖主於思患預防之中寓寬大不苛之意准情察事仁至義盡_臣等遵查故紳伍崇曜號稱巨富咸豐六年前督_臣黃宗漢勸派捐輸託稱籌借銀三十二萬兩約明六釐行息半年爲期指在海關稅項下撥給抵還給與海關印票其時並未有借自味夷之說迨同治元年十一月始據味國領事裨理以該國旗昌行出名申陳追

奏疏卷二

四

討經前督_臣晏端書奏明自同治二年八月起按月由海關扣還以未奉准部文尙未起扣_臣等蒞任之初體察情形知爲該紳託辭卽經據事指斥中國借貸洋商銀兩約期歸還不能稍逾時刻豈有約期半歲而遲至六年尙能支展之理且黃宗漢借之伍氏應黃宗漢歸還伍崇曜轉借之洋商應伍崇曜歸還各還各欠兩不相蒙黃宗漢辦事乖謬貽累至今無可解說然當時伍崇曜自云借貸黃宗漢自云勸捐伍氏避報捐之名黃宗漢收勸捐之利卽使黃宗漢尙在廣東亦必不能籌款歸還何況事隔數任時逾數稔又當艱難竭蹶之時

伍氏家貲雖不及從前較之官庫猶爲充裕自應仍由該紳設法清理適會該紳病故伍氏子弟無曉事者以致延擱嗣奉准戶部議駁卽飭廣州府李福泰諭知伍氏令以伍崇曜遺言報捐上紓

朝廷之隱慮下順本省之人情當爲籲懇

恩施從優獎敘一時亦尙未能定議荷蒙

諭旨垂詢臣等於此區區不能開論理處仰慰

聖廕倍增愧悚敬繹

諭旨有礙難宣示者數端不敢不爲

皇上陳之伍崇曜託名味商僅據該領事申陳旣經奏

奏疏卷三

完

請按限扣還因部文駁斥亦並未索追臣等所據爲辭

者印票交伍氏收存伍氏應別有借據交之味商若假

外人挾制當卽稟參儻明示以一落外人之手諸費脣

舌是旣寬伍氏挾制之罪又資外夷以口實使有所據

以行其恫喝印票在伍氏不能理處清晰必不肯退出

印票若在洋商不能全數歸還豈肯先行呈繳與其膠

轉而設法收回不如直截而正詞拒絕且與外夷交接

惟當據理以示之限制不當過慮以授之猜疑臣等所

謂礙難宣示者一也廣東艱窘情形官紳同關休戚臣

等每告諭伍氏直謂已出之財萬無索還之理一家收

其利而使一省承其累伍氏尙爲巨富亦何忍獨享無
論庫款豐歉不能籌還欽奉

寄諭無論借自何人總以速行歸款爲要伍氏若據

詔旨爲言臣等亦無從置辦是前之索還尙出於情求

今之索還且將以勢壓臣等所謂礙難宣示者二也此

項銀兩經戶部議飭捐輸歸款羅惇衍原奏亦稱向粵

東捐助歸款將由官捐既無此餘力將由伍氏私捐更

無此辦法廣東歷年辦理捐輸民力凋耗各州縣借捐

款爲辭正項錢糧報解益形短絀臣等以軍餉緊急前

督撫臣定有派捐章程恐其苛擾平民改爲按照富戶

奏疏卷三

五

酌量勸捐平民之氣爲之稍紓而在事謠謗之言反爲
之加甚爲地方籌辦軍餉已多行其阻難爲伍氏籌還
借款必更滋其抗拒既授以勸捐歸補之柄必且多方
要求期遂所欲臣等所謂礙難宣示者三也再四思維
應由臣等敬謹節錄

上諭宣示責成旋於正月二十二日接准戶部行知既
經鈔發則中外宣播必不能掩人耳目若據臣等節錄
之

上諭與鈔發之文比較必更有所藉口當卽商之毓清
暫將部文收藏內署先據羅惇衍原奏飭知伍氏令其

趕速清理如果實屬借之味商伍崇曜家屬力難全償亦必俟之情勢兩窮之日再行展限由官幫同料理斷不可先事惶惑使伍氏反得置身事外坐待地方官之區畫經營以收其已去之利應懇

皇上天恩俯准依照臣等此奏再下

諭旨責成伍氏自爲清理期使洋人不得生其猜疑伍氏不得行其挾制而臣等亦有餘地以與之辨論開導不勝悚惶待

命之至是否有當謹繕摺密陳伏乞

皇太后

奏疏卷三

三

皇上聖鑒訓示謹

奏

屯田溢坦變價已在八成以上餘坦無可變繳分別應
畱應豁以期核實而免苛擾合督總

奏爲屯田溢坦變價已在八成以上餘坦無可變繳分
別應畱應豁以期核實而免苛擾恭摺具

奏仰祈

聖鑒事竊查道光二十三、四、五、六等年辦理洋務善後
案內前督撫臣奏請將虎門官坦一百三十九頃零由
官圈築召佃耕種完租爲各礮臺添設弁兵俸餉經費
續又查辦沿海私墾溢坦一千九百一十一頃零議立
年限租額召佃承耕爲各礮臺員弁守兵增給薪水口

奏疏卷三

三

糧彼時急於見功貪多務得連未經出水之沙坦一律
召承迨後陸續報坍咨豁未邀部准佃戶力不能賠遂
致逃亡逋欠而原奏又有五年一加租之議咸豐元年
初屆加租前督撫臣體察情形萬難辦理據實瀝陳仰
蒙

文宗顯皇帝俯鑒民隱准予暫緩嗣於咸豐三年奉文
變價充支軍需前督撫臣屢次奏請設法變通截至九
年十二月止共變價九百四十九頃三十七畝零收價
銀七十五萬九千八百六十七兩零嗣又截至同治二
年五月初十日止續變三百九十餘頃收價銀二十七

萬六千九百二十九兩零均經先後奏明撥解各省協
餉及支放軍需口糧其同治二年五月十一日以後續
變六十餘頃收價銀四萬七百七十三兩零又陸續勸
諭紳富墊繳坦價銀十四萬二千一百二十九兩零約
應變抵屯坦二百四五十頃尙未指定坦畝換領執照
其銀亦歸同治二年軍需按季奏撥各在案臣等推求
此案延緩之由備悉辦理曲折之狀緣各屬上腴之業
有利可圖人皆樂於承領變繳自易中下之業以次遞
推至於辦理數年之久訖未承繳大率窪下水灘十年
九荒平時已屬欠租積久遂爲虛坦是以前督撫臣於

奏疏卷三

五

無可籌畫之中參酌成案准各佃戶另覓官荒抵兌變
價其本邑查無荒坦並准向別縣通融覓抵復慮其覓
抵遲延又經勸諭富戶墊繳價銀以待查坦撥給并委
員清查各縣新生溢坦撥抵屯虛於香山新會兩縣開
設分局多方搜剔無微不至而紳富墊繳坦價經年之
久尙未有指明坦地請領印照者足見所餘虛坦無可
召買之實情統計屯坦變價一千六百四五十頃收價
銀一百二十一萬九千六百九十八兩零已在八成以
上其餘坦田二百六七十頃若必令概行承繳坦價正
恐催繳日形短絀徒滋煩擾於軍餉屯政兩無裨益因

查咸豐五年戶部奏催本案變價文內聲明售變無期不若仍循其舊作為本案經費奏明停辦等因奉

旨允准在案其時軍餉緊急坦價開辦初有端倪未經遵照停止茲當撥括已窮之時籌辦築復礮臺之際亟應遵照咸豐五年戶部奏奉

諭旨奏明停辦以昭核實而循舊制第停止變價之後熟籌要需體察民隱不得不瀆懇

聖慈者蓋有三端一在酌定租額也查向來召佃輪租成案均就其地之肥磽酌定租之多寡從無於初勘水坦時預計數年迭次增加之事此案初議五年一加租

奏疏卷三

語

祇顧當時之飾觀悅聽並未計及後此之懸賦病民道光三十年開前督撫臣原奏言之甚詳茲查變價以外應存租坦二百六七十頃內有坦可耕之東莞明倫堂等坦一百餘頃該佃戶近年勉力照初次加租之數完納餘仍懸欠由局委員勘估委屬中下之產如照咸豐六年再次加租之數飭追各該佃已經力難支持萬不能再加至咸豐十一年三次之租應請即以再次加租永為定額免其再加以紓佃力一在勘豁虛租也查道光二十六年前督撫臣議奏章程內開佃坦卸准該佃隨時報明地方官稟請委員會勘屬實詳請豁租以

免賠累迨二十八九年香山佃戶何隆平報坍三十頃零覓荒抵補咨部議准照辦而新甯縣佃戶余創緒等報坍四十頃零無荒可覓戶部卽駁令照額征租於是各屬遇值屯坦坍佃戶不復呈報以致變價無人承領租欠又無可著追

國計民生爲之交困溯查廣東辦理沙田本有五年清文成例每屆五年之期丈溢者承升丈缺者減豁各歸各辦向無不准報坍必待覓荒抵補之例況道光二十六年奏辦屯田章程亦經定議准其報豁更未便失信於民現查無可變價無可征租之虛坦約有百數十頃應請照例開除以符原案一在請免積欠也上年變價各坦一千六百餘頃多係另招承買所欠舊租及現請開除虛坦原佃均已失業流亡歷年租欠萬無可追竊查同治元年欽奉

恩旨豁免咸豐九年以前民欠各省款項名目不一如河南之漕項雜稅直隸之租稅倉糧均經奏奉

諭旨飭部議准一律豁免通行各省遵照粵東屯租出自地畝與河南直隸之漕項倉糧竝無二致擬請比照通行成案仰懇

聖恩將咸豐九年以來屯欠一律豁免以廣

皇仁以上三項均係子細推求勢處萬難不得不爲民請命者可否

俯允所請出自

逾格鴻施所有各年奏銷_臣等已督飭屯田局司道趕緊造辦并將已未繳價各坦分案清釐應輸租者歸入屯田造報應升科者歸入民糧造報應請豁者歸入虛坦造報統俟恭奉

恩諭分別辦理再同治二年_臣等奏修城北礮臺工程請以虎門殘廢礮臺當經飭委候補知府海廷琛察看情形扼要處所不過數處而自咸豐八年礮臺被燬所

奏疏卷三

奏

餘大角大虎九宰竹洲新涌蕉門各礮臺基址猶存照舊支給臺兵口糧核其地勢均非扼要應酌量裁撤以節糜費其應存礮臺分配防兵所需口糧經費尙不甚鉅_臣等當與水師提督_臣會核樽節籌議另行奏報又查咸豐七年部議於坦價內增估銀二十萬兩發商生息八年部議卽不能如數增估亦當於所變之價酌留若干永遠生息各等語均係未悉粵省辦理艱難之故此時估變之計已窮不惟無可估增且無可酌留生息_臣等職司籌餉凡有可興之利不敢退縮畏難而事勢旣處必窮亦斷不敢支吾遷就據屯田局司道會詳前

來所有變價餘坦應行停止召買及統籌辦理緣由謹
合詞恭摺具奏伏乞

皇太后

皇上聖鑒訓示飭部知照謹

奏

奏疏卷二

五

催辦錢糧奏銷情形及現依部咨分別辦理片

會總督銜

再查廣東省自辦理軍務以來錢糧奏銷連年展緩迨展緩期屆不惟仍不能全完甚至循例具

題之冊又逾限經年方得造報前撫

臣

黃贊湯於同治

二年六月辦理咸豐十一年奏銷時曾經

奏明歷年逾限之由請將同治元年奏銷展至同治二

年年底爲限嗣後按年提前一月辦理

臣

等抵任後於

是年十月十九日據差弁賣回前摺後開議政王軍機

大臣奉

旨該部知道欽此當經恭錄飭遵茲據藩司糧道詳稱

奏疏卷三

奏

咸豐十一年奏銷前司道於同治二年六月截數出冊後尚有俸餉銀一十一萬九千餘兩武職養廉銀六萬九千餘兩無可支扣當經據實列冊報部所有同治元年餉米實自同治二年七月以後方始開支截至二年底尙未支及一半其故由於同治二年鹽運司庫所收鹽課先儘京餉解部餘贖應解藩庫之銀又因軍需緊急提撥二十萬八千兩以致奉部撥解藩庫充支壬戌年兵餉之鹽課四十四萬兩未解分釐藩庫收款少此鹽課鉅數各屬地丁又復請緩請蠲而軍需項下又提撥藩庫地丁銀三十二萬三千四百餘兩藩庫遂爲

之一空糧道庫糧料年額銀七萬兩例由藩庫撥支是年所收無幾而提撥糧庫屯價支應軍需之銀亦多至十六萬兩糧庫亦爲之一空以上三庫之銀一歲之間撥括以應軍需急款者七十餘萬兩同治二年業經按季詳請有案其同治元年軍需項下提支各庫銀款須等補奏者尙不在內此藩糧各庫同治元年各營俸餉支解不能及半之實在原委也至兵米一項綠營二十五萬九千餘石就近撥歸各屬開支除賊擾之區另行籌辦外餘俱惟所在地方官是問而旗營米石閏年九萬二百餘石無閏年八萬六千七百餘石係廣肇韶惠

奏疏卷三

堯

羅各屬三十四州縣征解理事同知兌收支放近年各屬逆匪肆擾土客交訖民力旣窮官之征解日絀每月開放只得儘各屬解到米石悉數散給有放六七成及八九成者而旗營則總按十成計算按月取盈所以近年支放兵糈無非挪新掩舊茲計旗營兵米僅放至同治元年六月底止糧料銀僅放至元年二月底止此後每月卽以十成趕放亦須同治三年七八月方能放足此又旗營米石支絀之實在根由也元年奏銷展限屆滿而旗營銷算冊屢催未據造送綠營未到者亦多至二十餘營以致無憑核算結總司道等焦急萬分籌思

再四惟有將一切遲延有因據實瀝陳會詳請

奏等情前來_臣等逐細體察所詳委屬實在情形隨又

推求各營造冊延緩之故如高州信宜初復肇羅土客

狃狃各營剿捕正繁凡茲循例事宜確有未能兼顧之

處此外各營均處綏靜之區亦復藉口餉米未清拖延

冊籍幾至固結不解_臣等當查餉糶未能應期係先顧

軍務急需之故而催取銷算冊僅照例核計該年升拔

建曠應支應扣之實數並非一經造報餉米便屬久懸

亦非延不造冊餉米便能早清也各營員任意將冊延

擱殊屬彼此兩悞又經諄切飭催去後各營稍稍明白

奏疏卷三

三

遵辦而造齊仍屬無期因思營冊未到祇係支數未清
地方官經征考成責任綦重展限屆滿既經截數亟應
將州縣官征解銀米數目及司道庫已經支發之款先
行造報免致例限久逾而各牧令催征之獎敘處分早
日核定亦可以昭激勸正在嚴飭辦理間適接戶部本
年二月初八日咨復咸豐十一年奏銷遲延案內文開
錢糧奏銷未完各官例有起限報參處分自應按限造
報庶歸核實豈容日久耽延自干議處此次既據該撫
將遲延緣由分晰咨報姑從免議此後歷年奏銷務須
遵照定限造報卽或營冊未到亦應隨時一面咨明一

面先行造報不得藉詞宕延以符定例等語核與_臣等
意見相同現經嚴飭藩司糧道勒限一箇月內先將各
州縣征解同治元年錢糧銀米敘參各冊趕造詳
題并將支過實數另具簡明清冊隨案送部查核一面
照案嚴催營冊到齊另行

題咨所有_臣等到任數月催辦奏銷情形及現依部咨
分別辦理緣由相應附片陳明伏乞

聖鑒謹

奏

奏疏卷三

空

